

Tha dà phrìomh seòrsa craobh ann a rèir
's dè an seòrsa duilleagan a th' orra.

1. Craobhan le duilleagan mòra
a bhitheas a' call an duilleach anns
a' gheamhradh. 'S e craobhan seargach
a chanas sinn riutha seo. Tha am fiodh
aca glè chruaidh.
2. Tha duilleagan caola mar snàthadan
air craobhan durcain agus tha iad gan
cumail fad' na bliadhna. Mar sin tha iad
sìor-uaine. Tha am fiodh aca glè bhog.

Tha mu 500 seòrsa craobh a' fàs ann am
pàircean agus ann an gàrraidhean mu
thimcheall Bhreatainn ach cha mhòr
nach ann à dùthchannan eile a thàinig iad
uile an toiseach. Uaireannan canaidh
sinn eil-thìreach riutha.

Mus do thòisich daoine a' toirt craobhan
eile a-steach cha robh ach mu 30 a bha
a' fàs gu nàdarrach ann am Breatainn.
'S e craobhan gnèitheach a chanas sinn
riutha agus tha duilleagan mòra air
a' chuid as motha dhiubh. 'S e darach,
uinnsean, caorann, leamhan, faidhbhile,
beithe, critheann, seileach is cuilìonn na
h-eisimpleirean as cumanta. Chan eil
ach trì craobhan durcain a tha gnèitheach
— a' ghiuthais Albanach, iubhar agus
aiteann.

G Coimhead ri mu 40 craobh anns
a' choille. A bheil aon seòrsa nas
cumanta na gin eile? Mar eisimpleir,
mas e darach, beithe no faidhbhile as
cumanta 's e coille sheargach a th' ann;
mas e ghiuthais Albanach as cumanta
's e coille dhurcain a bhitheas ann.

Tha mòran lusan eile a' fàs ann an coille.
Am faic thu na sreathan eadar-
dhealaichte?

Tha sreath ùrlar an toiseach le còinneach
is lusan ìosal.
Tha sreath achadh an uair sin le flùran
nas àirde agus raineach.
Tha sreath phreas an uair sin le preasan
agus craobhan òga.
Mu dheireadh tha sreath chraobhan le
craobhan a tha air a thighinn gu ìre.